

ՆՈՐԱԲԱՆՈՒԹՅՈՒՆՆԵՐԸ ԳԵՂԱՄ ՍԱՐՅԱՆԻ ՉԱՓԱԾՈՅԻ ԲԱՌԱՊԱՇԱՐՈՒՄ

«Մի համակրելի մտերմություն կա Գեղամ Սարյանի պոեզիայի մեջ, որը համակում է մեղմորեն: Գեղամ Սարյանը փայլուն չէ, չունի «շլացուցիչ» ոչինչ: Նա համեստ է և հավասարակշիռ: Բայց ջերմ է»¹: Այդ ջերմությունը զգացվում է նաև Գեղամ Սարյանի չափածոյի խոսքարվեստում:

Գրողի լեզուն և ոճը, մասնավորապես նրա բառապաշարն ուսումնասիրելիս մեծ նշանակություն է ձեռք բերում նորակազմ բառերի, նոր բառ-խմաստների և բառագործածությունների քննությունը: Վերջիններս «գնահատվում են որպես հեղինակի ներդրում գրականության լեզվի զարգացման մեջ կամ որպես արդյունք գեղարվեստական նպատակներով առաջացած անհատական բառաստեղծման»²: Գեղարվեստական ստեղծագործության բառապաշարի ուսումնասիրության առումով կարևորվում է անհատական-հեղինակային նորակազմությունների քննությունը, որի դեպքում «պարզվում են տվյալ հեղինակի բառային-գեղարվեստական ստեղծագործության անհատական ոճին բնորոշ հնարքներն ու միջոցները»³: Ոճական նպատակադրումով, ասելիքը բանաստեղծականորեն, պատկերավոր ու հուզական արտահայտելու համար ստեղծագործողն իր կազմած նոր բառերով, նոր բառագործածությամբ, բառի խմաստային դաշտի ընդլայնումով թարմացնում է տվյալ լեզվի բառապաշարը, նորովի հնչեցնում մոռացված, «դարերի փոշով ծածկված» շատ բառեր ու արտահայտություններ: Սրանց մեջ առավել հաջողվածները «կարող են արմատաճալ լեզվի մեջ»⁴, դառնալ գրական լեզվի հարստությունը և մուտք գործել տվյալ ազգային լեզվի բառագանձը: Այսպիսով գրողը նպաստում է նաև լեզվի բառային կազմի համալրման գործընթացին:

Անհատական նորաբանությունները, ստեղծվելով խոսքային համապատասխան իրադրության մեջ, նպաստում են լեզվի արտահայտչականության հնարավորությունների ընդլայնմանը: Ուստի գրողի լեզվաոճական առանձնահատկությունները բացահայտելու համար կարևոր է հեղինակային նորաբանությունների քննությունը, քանի որ դրանք առարկաները, երևույթները, հասկացությունները, շրջակա աշխարհը անհատական ընկալումով արտահայ-

¹ Դ. Ղեմիրճյան, Երկերի ժողովածու, հտ. 12, Եր., 1985, էջ 362:

² В. В. Виноградов, Проблемы русской стилистики, М., 1981, ст. 205.

³ Տես նույն տեղում:

⁴ Տես Ս. Էլյան, Ժամանակակից հայերենի բառային ոճաբանություն, Եր., 1989, էջ 224:

տելու արդյունք են: Որոշակի դժվարություն, եթե չասենք անհնարինություն և պայմանականություն կա այս կամ այն գրողի կերտած նոր բառերը ճշտությամբ և հստակորեն որոշելու հարցում, քանի որ համապատասխան հեղինակային բառարաններ գրեթե չկան: Դժվարությունը, երբեմն էլ անորոշությունը պայմանավորված են նրանով, որ առանձին դեպքերում հնարավոր չէ միանշանակ պնդել, թե այս կամ այն բառը Սարյանից առաջ գործածվել է, թե՛ ոչ: միգուցե այդ բառը երբևէ գործածվել է որևէ գրողի երկում, բայց ընդգրկված չէ արդի հայերենի բառարաններից որևէ մեկում: Այս դեպքում հեղինակային նորաբանությունների ընկությունը անհնարին է դառնում: «Անհրաժեշտ է նշել, - գրում է Ս. Էլոյանը, - որ հեղինակային նորաբանությունների ստույգ որոշման խնդիրը հղի է թյուրիմացություններով ու սխալներով, քանի դեռ չունենք բոլոր գրողների ու բանաստեղծների բառարանները, էլ չենք ասում նրանց նորաբանությունների ցանկը»⁵:

Այս բոլորով հանդերձ նոր բառերի հեղինակային պատկանելության մասին պետք է խոսել որոշ վերապահությամբ:

Գեղամ Սարյանի չափածոյից քաղված հավանական նորաբանությունների վերաբերյալ մեր բոլոր դատողություններն ու դիտարկումները սահմանափակվում են այն բառազանձի շրջանակներով, որ ընդգրկված է արդի հայերենի բառարաններում: Այս սկզբունքով քննելով Սարյանի չափածոն՝ հեղինակային նորաբանություններ ենք համարել բոլոր այն բառերը, որոնք.

ա/ Չկան Ստ. Մալխասյանցի /ԶԲԲ/, Էդ. Սղայանի /ԱԶԲԲ/, Ժամանակակից հայոց [եզվի բացատրական բառարաններում /ԺԶԲԲ/⁶:

Այդպիսիք են հետևյալ նորաբանությունները՝ «Ես դիտեցի կանաչները նրբածին» /Եժ, հ.1, 51/⁷, «Եվ փնջալամա լուսի վառքով Փողոցները կզուգվեն» /ՀՍ, 19/⁸, «Սեր լուսավարող, քանդակագարդ Ու միշտ զվարթ երևան»/Եժ, հ.1. 412/, «Պարտեզի մեջ բլուրեռագես Շատրվանով ավազան» /ՀՍ, 18/, «Եվ քարայծեր ծլուղաեղջյուր...» /ՀՍ, 95/:

բ/ Չկան ԶԲԲ-ում, իսկ ԺԶԲԲ-ում և ԱԶԲԲ-ում տրված են միայն Գ. Սարյանի չափածոյից քաղված օրինակներով կամ հզվդ. /հազվադեպ/ նշումով, ինչպես՝ *խղաթև, սևաթև* /հ.1,25/, *շաքարահոս, զվարթահոս* /հ.1,306/, *խիմդաշաղախ* /հ.1,74/, *շուշանաթերթ* /հ.1, 272/, *երկաթաթրթ* /հ.1,413/, *գեղիորան* /հ.2, 221/, *խոհածին* /հ.2, 218/, *բյուրեղակուռ* /հ.1, 363/, *լուսագես* /հ.1, 263/:

⁵ Տես նույն տեղում:

⁶ Փակագծերում նշված են բառարանների համառոտ անվանումները:

⁷ Գ. Սարյան, Երկերի ժողովածու, հ. 1, հ. 2, եր., 1969:

⁸ Գ. Սարյանի «Յրաշալի սերունդ» պոեմը /1950/ այստեղ և այսուհետև ՀՍ համառոտագրությամբ է նշվում:

դառնաթով /հ.1, 30/, ոսկեսապատ /հ.1, 306/, եզաքայլ /ՅՍ, 112/, նրբաթև /ԵԺ, հ.2, 107/, խոհածին /ԵԺ, հ.2, 218/, և այլն:

Այս շարքի նորաբանությունները, որոնք փաստագրված են բառարաններում, կարևոր նշանակություն ունեն մասնավորապես դրանց հեղինակային պատկանելության, առհասարակ դրանց մասին պատկերացումն ավելի հավաստի ու հիմնավոր դարձնելու գործում:

զ/ Նույնությամբ կան միայն էդ. Աղայանի բառարանում և տրված են այն իմաստով ու նրբերանգի բացատրությամբ, որով գործածել է Սարյանն իր բանաստեղծություններում կամ ունեն հզվդ. նշումը: Ամենայն հավանականությամբ, դրանք բառարան են ներմուծվել Սարյանի չափածոյից:

Այսպես, դագառածայն բառը բացատրվում է այսպես. ածական նշումով, դագաղի ծայն հանող՝ ունեցող /ԱՅԲԲ, հ.1, էջ 270/. օրինակ.

Դագառածայն՝ որպես մահասարսուռ քայլերգ,

Դոփում են գետինը միլիոն կենտ հենակներ: /ԵԺ, հ.1, 283/

Կամ՝ մոխրակուտակ բառը բացատրվում է հետևյալ կերպ. ած. 1. որտեղ մոխիր է կուտակվել, 2. փխր. մոխրագույն ամպերով պատած, մոխրակուտակ երկինք /ԱՅԲԲ, հ.2, էջ 1025/

Օ՛, երկինք մոխրակուտակ. Օ՛, անծրև, երկնի արցունք,

Օ՛, գեփյուռ, մաքուր համբույր, Օ՛, երկինք մոխրակուտակ... /ԵԺ, հ.1, 35/

Երկաթածայն նորաբանությունը բացատրվում է. երկաթի ծայն հանող, երկաթի պես հնչող /ԱՅԲԲ, հ.1, էջ 346/

ՈՒ մինչ լույս լսեցի ես

Երկաթածայն երգը նրա... /ԵԺ, հ.1, 257/

Ի դեպ, պետք է նկատել, որ 20-րդ դարի 20-30-ական թվականների չափածոյում բավական բարձր հաճախականություն են ունեցել երկաթ բառով ստեղծված նորաբանությունները:

Գեղամ Սարյանը հաճախ ստեղծել է դիպլածական բառեր, որոնք, ինչպես հայտնի է, հիմնականում ունենում են մեկանգամյա կիրառություն և գրական լեզվի բառապաշար չեն անցնում: Ինչպես գիտենք, դիպլածային բառերը գործածվում են խոսքային տվյալ իրավիճակում նյութի թելադրանքով կամ հեղինակի ոճական որոշակի նպատակադրումով՝ խոսքն ավելի համոզիչ, պատկերավոր դարձնելու համար⁹: Սարյանի չափածոյում գործածված դիպլածային բառերից են՝ *փնջալամպ*, *մոխրակուտակ*, *բյուրեղագես*, *դագաղածայն*, *նյուղանեղջյուր*, *ականջել*, *երկաթաթոք*, *երկաթածայն*:

⁹ Տե՛ս, Լ. Եզեկյան, Ոճագիտություն, Եր., 2003, էջ 140:

Անշուշտ, այս բառերը անհաջող կազմություն-կիրառություններ են: Առանձին դեպքերում բովանդակությունը արտահայտությանը չի ներդաշնակում կամ անորոշ է նորաստեղծ բառի իմաստը: Սյս նորակազմությունները անարտահայտիչ են և ստեղծվել են բանաստեղծի ապրած ժամանակաշրջանի թելադրանքով: Ռիչարդավ է նաև այն, թե ինչ ուղիներով են ձևավորվում հեղինակային նորաբանությունները: Գեղամ Սարյանի չափածոյում գերակշռող են հիմնականում բառաբարդման եղանակով կազմվածները: Դրանց մի մասը կազմվել է առարկաները, երևույթները նոր ձևով արտահայտելու անհրաժեշտությամբ, ինչպես՝ *երկաթածայն, լուսավարդ, բյուրեղագես, ոսկեսապատ, լուսագես, բյուրեղակուռ, մոխրակուտակ, փնջալամպ*: Մի մասն էլ բանաստեղծը գործածում է իր ասելիքը, խոհերն ու տրամադրություններն արտահայտչական ու ոճական անհրաժեշտ նրբերանգներով ներկայացնելու համար, ինչպես՝ *նրբածին, նրբաթև, սևաթև, զվարթահոս, դառնաթով, գեղիրան, խոհածին, խոլաթև*: Գեղամ Սարյանի չափածոյում քիչ թիվ են կազմում նորակերտ բայերը: Այսպես, Սարյանը կերտում է ականջել բայը, որը ԺՅԲԲ-ում /հ.1, էջ 24/ ներկայացված է հեղինակային վկայությամբ. Սակայն հոգիս, ականջում է նոր կյանքի երկաթածայն քայլերին /Սար./: Կամ հետևյալ օրինակում.

Ես դիտեցի լուրթ ջրերը փրփրածին,

Ականջեզ նրանց մրմունջը տրտում... /ԵԺ, հ.1, 51/

Բայական նորաբանություն է նաև առծաթել բայը, որը ԺՅԲԲ-ում /հ.1, էջ 225/ ներկայացված է հզվդ. նշումով և հեղինակային վկայությամբ. Ժամանակը կարծաթի մագերղ մի օր /Սար./: Սյս բայը Սարյանը կերտել է արծաթ գոյականից: Կամ՝

Նայեց աշխարհին մի գունատ լուսին,

Արծաթեց լույսով ջրերը զվարթ: /ԵԺ, հ.1, 154/

Որոշ նորակազմ բարդություններ ստեղծելիս Գ. Սարյանը դիմել է բառակազմության մեկ այլ գործունե եղանակի՝ համաբանությանը: Այդպես է ծնվել շուշանաթերթ նորաբանությունը՝ ծաղկաթերթ բառի նմանողությամբ:

Կիջնի ահա երեկոն, կբացվեն լույսի

Շուշանաթերթ լամպերի կոկոնները վառ... /ԵԺ, հ.1, 272/

Սյս քառատողում շուշանաթերթ նորակազմությունը նույն դերն է կատարում լամպի համար, ինչ-որ ծաղկաթերթը՝ կոկոնի համար: Այն և՛ կազմության, և՛ իմաստային առումներով ունի ընդգծված քնարականություն, ցույց է տալիս գույն, ձև և ստեղծում է որոշակի տրամադրություն:

Գեղամ Սարյանի չափածոյում որոշակի արտահայտչականություն են ստեղծում նաև բառերի կրճատ ձևերով գործածությունները:

Ընդունված կարծիք է, որ լեզվում կատարվող կրճատումները, նույնիսկ հնչյունների կրճատումը արտահայտությունն են այն բանի, որ լեզուն նախապատվությունը տալիս է առավել սեղմ և կրճատ ձևերին: Բառերի կրճատ ձևով գործածություններ կան Սարյանի չափածոյում, որոնք, սակայն, մեծ թիվ չեն կազմում: Քննենք մի քանի բնագրային օրինակներ.

Մեր ծորերը խոր, լեռները անառ,

Գանձերն անսահման երկրի ընդերքում... /ԵԺ, հ.1, 339/

Ընդունված և տարածված բառային տարբերակը անառիկն է, սակայն հեղինակը նախընտրել է առանց իկ մասնիկի կարճ ձևը՝ անառ:

Նկատելի է, որ հեղինակը հաճախ է դիմում սեղմության այս միջոցին և գործածում անածանց ձևեր, ինչպես օրինակ բազմառառան և դամբառան բառերի փոխարեն կիրառում է բազմադար և դամբան բառածևերը, որոնք սեղմ են, հատու և արտահայտիչ:

Մեր բազմառառ տառն են սիրել,

Մեր հայրենի գիրքը:

/ԵԺ, հ.1, 314/

Այն դամբանի վրա ամեն մի քար

Ողողված էր որքա՞ն թախիծով ու լույսով: /ԵԺ, հ.1, 297/

Այսպիսի բառերի գործածությունը նպատակամղված է ոչ միայն խոսքի թարմության, այլև սեղմության ապահովմանը: Սարյանի բանաստեղծություններում նորաբանությունները անփոխարինելի դեր ունեն հատկապես չափածո խոսքի կարևոր հատկություններից մեկի՝ բարեհնչության ապահովման համար: Այդ դեպքում կարևոր է ոչ միայն նորաբանության հնչյունական կազմը, այլև դրա նշանակությունը բանաստղերի հնչյունական շղթայի հետ: Հնչյունական ներդաշնակության առումով կատարյալ է այնպիսի խոսքը, որ հարմար է արտասանության համար, հաճելի՝ լսողությանը: Խոսքի բարեհնչության ապահովման գործում առաջնակարգ դեր ունի հանգավորումը: Բանաստեղծական խոսքի բարեհնչությանը առավել չափով է նպաստում այնպիսի հանգավորումը, որն արտահայտված է լինում միայն նորաբանություններով: Սարյանի չափածոյում հետաքրքրություն ունեն հանգավորման այդպիսի մի քանի դեպքեր.

Աշխարհ, ես էլ գիշեր ունեմ սևաթև,

Երբ իմ հոգին տրտունջ ունի ու հառաչ,

Գարուն ունեմ, ձմեռ ունեմ խուլաթև,

Աշխարհ, ես էլ մի աշխարհ եմ քո առաջ:

/ԵԺ, հ.1, 25/

Հայաստանի զմառափոս

Ջրերն են անուշ,

Խաղողների շաքարահոս

ճռերն են անուշ:

/ԵԺ, հ.1, 306/

Նկատելի է, որ ընդգծված նորաբանությունների վերջին բաղադրիչները արտահայտված են մույն բառերով, որոնք նպաստում են խոսքի բարեհնչությանը: Ինչպես գիտենք, անհատական նորաբանությունների մեկնության հարցում առանձնակի կարևորություն ունեցող հանգամանք է դրանց բազմիմաստության բացահայտումը: Գեղամ Սարյանի չափածոյում դառնաթով նորաբանությունը հանդիպում է մեկ անգամ: ԺՅԲԲ-ում /հ.1, էջ 471/ այն ներկայացված է Սարյանի հետևյալ գործածության հիման վրա.

Դառնաթով հոգով ես նոր իմացա,

Որ ես եմ թախծոտ, տխուր ակացին: /ԵԺ, հ.1,30/

Սեզ հայտնի չէ այդ բառի այլ գործածություն: Չնայած դրան՝ այդ նորաբանությունն ԱՅԲԲ-ում ներկայացված է երկու նշանակությամբ. դառնաթով, ած./բնստ./: 1. Դառնությամբ թովված, համակված՝ տոգորված: 2. Դառնությամբ՝ տխրությամբ թովող՝ գրավող, գրավչության հետ մաս դառնություն ունեցող՝ պարունակող /ԱՅԲԲ, հ.1, էջ 278/: Այսպիսի բառերի երկրորդ իմաստային առումը գերազանցապես բառարանագիրների կողմից է առաջ քաշվում, հնարավոր է համարվում բառի մաս այդպիսի նշանակությամբ գործածությունը: Բառարանում այդպիսի նշանակության արծանագրումը կարող է խթանիչ դեր ունենալ բառը մաս այդ նշանակությամբ գործածելու հարցում:

Սարյանի չափածոյում հետաքրքրական է մաս նորաբանության ոճական գործածությունը հականշային հարաբերության ուղորտում:

Սեկը արագ, մեկը եզաբալլ.

Տարբեր-տարբեր կողմերով: /ՅՍ, 112/

Ինչպես նկատելի է, այստեղ հականշությունը դրսևորվում է նորաբանության և համագործածական բառի միջև, թեև բարեհունչ չէ նոր բառի ծայնական կազմը: Նորաբանությամբ արտահայտված հակադրությունով բանաստեղծական խոսքը մեծապես շահում է թարմության առումով:

Քննելով Սարյանի չափածոյում գործածված նորակազմ բառերն ու այլ կարգի նորաբանությունները՝ կարող ենք ասել, որ Գեղամ Սարյանն ինքնատիպ ձեռագիր ունի այս ասպարեզում: Աշխարհն ու երևույթները բանաստեղծական յուրահատկությամբ ընկալելու և արտահայտելու ներուժով նա ստեղծում է նոր կազմություններ: Դրանցից շատերը ընդգրկվել են արդի հայերենի բառարաններում: Այսպիսով, Գեղամ Սարյանի նորաբանություններում գերակշռող են բարդությունները, որոնք, որոշ բացառություններով, իրենց կառուցվածքով, արտահայտած իմաստներով, ոճական արժեքով ընդունելի ձևեր են:

Վերը արված դիտարկումները վկայում են, որ բազմաբնույթ նորաբանությունները էական նշանակություն են ունեցել Սարյանի ոճի ինքնատիպության և թարմության ձևավորման համար: